



Coxes seintens y coxi seintens,

dessigü s'ëis bele intenü tan atramënter che tröp é chëst ann. Ince la festa de San Micurá ai 6 de dezëmber sará atramënter. Mo i podun pa bëgn impó la festejé y chiló essi na bona idea ...

Ma de püc sanc vëgnel cunté tan de stories sciöche de San Micurá. Chiló te Südtirol él encër cincanta dljies dedicades a chësc sant. Pól ester che i ne n conescëise ince os öna o l'atra? La jënt â na gran ligrëza cun San Micurá, porchël cuntunse ince incö ciamó de d'ël. Les stories nes cunta che al ti orô bun ala jënt, che al la daidâ inclunch olache al sciafiâ. Al â en gran cör, dantadöt por chi che ê tla meseria y ti fistidi. Al á porvé da odëi te döt le bun y da fá instës ince dl bëgn!

I sanc é porsones, che é bones da nes fá sintí Chël Bel Dî te na manira dër particulara. Y da sintí Chël Bel Dî ne mëssel pa nët nia ester de gran mirachi, mo al basta de pici sëgns fac cun amur. Na storia cunta che san Micurá passâ vign'ann, la sëra dan so compliagn fora por cité y ti metô scincundes a mituns dala meseria dan porta. Ma insciö. De te sëgns sunse bëgn düc nos bugn da capí zënza gran spligaziuns. Ai nes dij: Bel che tö es al monn! Zënza te ne foss mia vita nia tan bela! Dilan! Al n'ó nia ester tröp, sce al vëgn dal cör.



I sun düc Micurá!

Propi chëst ann pó la festa de San Micurá nes recordé **da odëi dantadöt le bun** sciöche San Micurá. Al é important che i nes dijunse y nes mostrunse tres indo un al ater: I t'ó bun! Tö es por me prezios/a! I speri che ara te vais bun! I sun chiló por te! Savëise ci proposta che i oress porchël ves fá? **Nos düc sun chëst ann San Micurá!**

Sciöche San Micurá podunse ince nos se damané: **A che poi pa ti fá dl bëgn?** Magari te mia familia, cun na buna parora o en pice sëgn? O magari

poi ti fá a zacai na picia ligrèza sce ara ne ti vá te chësc tëm্প nia tan bun? Ince chërdé sö zacai o n pice message pó fá ligrèza. Al é pa bëgn tröc sëgn che an pó fá, ince te chësc tëm্প. Insciö sarunse düc un por l'ater San Micurá! Insciö vëgnel fat de bëgn ince tres nos!

Sciöche vësko ái ince iö ligrèza cun San Micurá. Al é por me sciöche vësko n gran sant y compagn. Al me dëida recordé, me y nos düc, ci che al ó dí ester cristiagn: che i imparunse da Gejú, che i nes daidunse un cun l'ater, che i scincunse inant speranza y che i ti dijunse a düc: Chël Bel Dî é dlungia nos, al nes ó bun!

Prësc é l Nadé

La festa de San Micurá nes dij: Ara ne döra nia plü dî spo é l Nadé. Dailó festejunse le compliagn de Gejú. Al é döt de Chël Bel Dî y döt nost. Al é gnü n möt, insciö sciöche os sëis sëgn. Al ó nes acompagné por dōta la vita. Tan important é Nadé. Tan bel é ci che nos cherdun!

Che Gejú ves benedësc, os, üsc geniturs, neni, fredesc y sorus y düc chi che i ti orëis bun, por interzesciun dl vësko sant, San Micurá,

Osc Vësko + Fto

2. domënia d'Advënt, festa de San Micurá, ai 6 de dezëmber 2020

Oste depënje chësc dessëgn y ti le scinché a valgügn?

